

DOMENIE XXX «VIE PAL AN»

Jutoris pe Liturgjie

Domenie, ai 25 di Otubar dal 2020

Alore Gjesù ur vierzè la ment par lâ a font des Scrituris (Lc. 24, 45)

Vite – Bibie – Popul

Par “Lectio divina - Leture divine de Bibie” si intint une amicizie cul Signôr li che une persone si svicine a la Bibie te preiere; la leture e sarà semplice ma fate te fiduciose invocazion al Spirtu Sant che al darà la sô lûs: in chê lûs o savarin fâ miôr lis sieltis de nestre vite.

*La strade che nus mene a la - **leture de Bibie te preiere** - e à cinc moments:*

Invocâ:

Invocâ il Spirtu Sant.

Lei:

lei il test de Bibie cun calme e atenzion.

Meditâ:

meditâ sul verset let e pussibilmentri su altris versets colegâts.

Cognossi:

cognossi cualchi coment di personis santis e de tradizion cristiane.

Valutâ:

valutâ cu la lûs che e ven de Peraule, lis sieltis di fâ te nestre vite.

O savin che la peraule dal Signôr e je fate pai piçui e pai sempliçs; cun lôr si cjatìn ancje nô. I cinc vierfs nus judin dome a orientâsi miôr par che o sedin fra chei che a scoltin la peraule, le acetin e a butin, cui il trente, cui il sessante e cui il cent (Mc 4, 20).

Cfr. dal libri di Carlos Mesters: Far ardere il cuore - Ed. Messaggero Padova.

* * *

Tu amarâs il Signôr to Diu... Tu amarâs il to prossim... Ma cemût vole ben vuê? Di fat l'amôr al è come la veretât: a son simpri al di là dal nestri amôr e de nestre veretât e a cjapin forme e limit a seont dal timp, dal lûc, de culture e de persone. Amôr e veretât a restaran par simpri limitâts a chei agns, a chê zone, relatîfs a chel contest storic. Baste pensâ al amôr sponsâl e a lis diversis manieris legitimis che al ven vivût seont lis societâts, lis tribùs e lis religjons.

A dut chest o vin di cjâlâ cence diventâ fundamentaliscj te tradizion, cence vueris ideologjichis e tun rispjet sincêr viers di ducj. L'avignî dai popui e de nestre pâs al dipendarà des nestris sieltis di tolerance, di rispjet e di no-violence.

Tal incuintri di vuê, Gjesù al conferme i doi comandaments dal amôr de tradizion gjudaiche; ma par nô, al è miôr cjâlâ a la sô esperience di vite: cemût lui ajal vivût l'amôr a Diu e al prossim?

San Pauli nus vise: Cirî di sintî dentri di vualtris ce che al à di sintî chel che al è in Crist Gjesù (Fi 2, 5); par che no nus sucedi ce che al è scrit tal profete Osee li che il Signôr al dîs: il vuestri bonvolê al è come un nûl di buinore / come la rosade che si sfante tun lamp (6, 4).

Antifone di jentrade

Sal 104,3-4

Che il cûr si indalegri di ducj chei ch'a van cirint il Signôr.
Cirîf il Signôr e la sô potence;
cirîf di un continui la sô muse.

Colete

Diu onipotent e eterni,
fasinus cressi la fede, la sperance e la caritât,
e, par podê vê ce che tu imprometis,
fasinus volê ben a ce che tu nus comandis.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Es 22,20-26

Se ur fasarês malegraciis a la vedue e al vuarfin mi vignarà sù la fumate cuintri di vualtris.

Par noaltris si podarès dî: no sta cjâlâ dal alt in bas il rifugjât che al è culî (al à di ce insegnâti ancje lui); no sta maltratâ la tiere come che tu stâs fasint (si rivoltarà cuintri di te); no sta butâ tai cassonets il mangjâ che tu âs di plui (milions e millions di personis a patissin la fan); no sta cjâlâ dome ai tiei interès (dongje di te al è dal sigûr un che al domande jutori); no sta stimâti autosuficient (al baste un lamp e un nuie par mandânus in chel altri mont); no sta croditi onipotent (ma par fânus capî chest al pense il COVID-19), no sta iluditi di lâ indevant cence Signôr (i risultâts negatîfs a son a puartade di man).....

Lassinsi cumò istrui di cheste grande pagjine dal Vieri Testament.

Dal libri dal Esodo

Cussi al dîs il Signôr: «No sta fâi malegraciis al forest e no sta tibiâlu, parcè che ancje vualtris o vês stât forescj te tiere dal Egjit.

No stait a maltratâ une vedue o un vuarfîn. Se tu i fasis malegraciis e lui al berle viers di me, jo o scoltarai il so berli; mi vignarà sù la fumate e us fasarai murî cu la spade: cussi lis vuestris feminis a restaran veduis e i vuestris fîs vuarfins.

Se tu i imprestis bêçs a di un de tô gjernazie, al pûar ch'al è a stâ cun te, no sta fâ cun lui compagn di chel ch'al impignore; no sta pratindi nissun interès. Se tu cjolis in pegn la manteline di un altri, tu âs di tornâje cuant che il soreli al va a mont. Al à dome chê par taponâsi, e je la manteline che si invuluce: cun ce aial di pognisi? S'al berle viers di me, jo lu scoltarai, parcè che jo o ai cûr».

Peraule di Diu.

SALM RESPONSORIÂL

dal Salm 17

Nol è che noaltris o vin di volê ben al Signôr par vie dal comandment, ma parcè che lui nus à volût ben par prin; o ricambìn dome il so amôr, se lu vin sperimentât tes dificoltàts de vite.

Alore sì che in sinceritât o podìn preâ il salm responsoriâl e cjantâ il ritornel:

R. Ti vueil ben, Signôr, che tu sês la mê fuarce.

Se cjantât: Il cjant dai salms responsoriâi, p. 80.

Signôr, mê crete, gno salvament e mê fuartece;
gno Diu, crete là ch'o voi a parâmi;
gno scût, potence che mi salve. **R.**

O ai clamât il Signôr
e le ai scapolade dai miei nemîs.
Vive il Signôr e benedete la mê crete,
ch'al sedi laudât chel Diu che mi à dât jutori. **R.**

SECONDE LETURE

1 Ts 1,5-10

Si sês convertîts, slontanantsi dai idui, par servî il Diu vîf e vêr e spietâ dai cîi so Fi.

I fedêi di Tessaloniche a àn acetade la peraule dal vanzeli framieç di tantis tribulazions. Chest timp di Coronavirus, cu lis sôs polsis sfuarçadis, al podarès diventâ ancje par nô timp prezios par vicinâsi cun plui calme a la Bibie te preiere; la leture e sarà semplice ma fate te fiduciose invocazion al Spirtu Sant che al darà la sô lûs: in chê lûs o savarin fâ miôr lis sieltis de nestre vite.

De prime letare di san Pauli apuestul ai Tessalonicês

Fradis, o savês cemût che si sin compuartâts framieç di vualtris pal vuestri ben.

E vualtris o vês copiât di nô e dal Signôr, acetant la peraule framieç di tantis tribulazions ma cu la gjonde dal Spirtu Sant, che di fat o sês diventâts un spieli par ducj i fedêi de Macedonie e de Acaie. Midiant di vualtris, di fat, la peraule dal Signôr e à rimbombât no dome in Macedonie e in Acaie ma la innomine de vuestre fede in Diu si è slargjate pardut, di mût che nol covente che nô int fevelin. Di fat e je la int stesse ch'e fevele dal acet che nus vês fat e di cemût che dai idui si sês convertîts a Diu par servî il Diu vîf e vêr e par spietâ dai cîi so Fi ch'al è resussitât dai muarts, Gjesù, che nus libere dal svindic ch'al sta par rivâ.

Peraule di Diu.

CJANT AL VANZELI

cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,
parcè che ai piçui tu âs palesât i misteris dal ream dai cîi.

R. Aleluia.

VANZELI

Mt 22,34-40

Tu amarâs il Signôr to Diu e il prossim come te in persone.

Il prin comandament al è il cjaveç che al ten sù dut, come che a predicjavin saldo i plevans di une volte: Initium sapientiae timor Domini - Il timôr dal Signôr al è il cjaveç dal savê (Pr 1, 7).

Il secont comandament al è spieli e al sentencie su la juste pratiche dal prin; di fat chel che nol ûl ben a so fradi che lu viôt nol pò volêj ben a Diu che no lu viôt (1 Zn 4, 20). Tignin presint ancje che il document di fonde e esâm di cussience sul amôr e reste simpri la Prime ai Corints 13, 1-13: Se ancje o feveli lis lenghis dai agnui...

Dal vanzeli seont Matieu

In chê volte, i fariseos, savût che Gjesù al veve fat tasê i saduceos, si derin dongje ducj e un di lôr, espert di leç, lu interpelâ par metilu a lis provis: «Mestri, cuâl esal il comandament plui grant de leç?». I rispuindè: «Tu amarâs il Signôr to Diu cun dut il to cûr, cun dute la tô anime e cun dutis lis tôs fuarcis. Chest al è il plui grant e il prin dai comandaments. Ma il secont al è compagn di chel: Tu amarâs il to prossim come te in persone. Di chescj doi comandaments e dipent dute la Leç e i Profetis».

Peraule dal Signôr.

Su lis ufiertis

Cjale di bon voli, Signôr,
i regâi ch'o presentin a la tô maiestât,
par che l'ufierte dai tiei servidôrs

e ledi sù viers de tô glorie.
Par Crist nestri Signôr.

Antifone a la comunion

cf. Sal 19,6

Si indalegrarìn de tô vitorie
e o gjoldarìn tal non dal nestri Diu.

O ben: cf. Ef 5,2

Crist nus à volût ben e si è ufiert par nô,
ufierte e sacrifici a Diu plen di bon odôr.

Daspò de comunion

I tiei sacraments, Signôr,
ch'a operin in nô ce ch'a significhin,
par ch'o podìn gjoldi te plenece de veretât
ce che cumò o fasìn in maniere velade.
Par Crist nestri Signôr.

* * *

Sante messe e Eucaristie, rîts, preieris, cjants: Hosanna pp. 34 - 119.

* * *

Tu amarâs il to prossim come te in persone.

Pandemie... comunitât di destin... dolôr... amôr al prossim ... sperance

(.....) Nel cuore di alcune immagini, come nella immagine luminosa e umbratile di comunità di destino, esplodono mille sentieri che ci portano a riflettere sulla realtà del dolore e della tristezza, della inquietudine e della disperazione, a cui siamo consegnati, ma anche sulla realtà di quell'anelito del cuore che ci induce a non lasciare morire la speranza in noi; ed è un richiamo a cui non possiamo sfuggire.

Certo, nel momento in cui strategie di globalizzazione, di comunicazione febbrile e angosciante, di complessità vertiginosa, immergono il mondo in una crisi oscura e imprevedibile, anche parole bellissime come queste di comunità di cura e di destino, sembrano offrire solo logomachie, orizzonti astratti e lontani dalla realtà. Ci si deve allora arrendere a questa disfatta delle parole, e a questa dissolvenza degli arcobaleni di speranza che, benchè fragili e intermittenti, solcano i cieli stellati della nostra immaginazione e delle nostre speranze? Non vorrei davvero che fosse così: qualcosa è ancora possibile partendo da quella cellula originaria che è la relazione, la partecipazione, il dialogo, il destino di perdita di angoscia che siamo chiamati a condividere con gli altri.

Se la nostra logica non è la fredda e implacabile logica della ragione, se la nostra logica è quella del cuore, allora può non morire in noi, e per gli altri da noi, la speranza: la speranza nel suo misterioso e talora insondabile che ci fa riconoscere l'egoismo, la fine dell'altro, la fuga dinanzi alla responsabilità, la fuga dinanzi a se stessi. La speranza, ancora una volta, cresce fragile e luminosa in un mondo che ha troppe certezze e troppe sicurezze; in un mondo che non sa più guardarsi

dentro; in un mondo lacerato e ferito, che non sa più provare il dolore e riconoscere il dolore nella sua donazione di senso.

Ma è necessario vivere in questo mondo, attraversarlo come si attraversa un deserto, nella speranza che possa nascere una comunità di destino fra chi cura e chi è curato, fra chi chiede aiuto e chi offre il suo aiuto; ma senza questa speranza non attraverseremmo il deserto e sarebbe il deserto a crescere in noi: oscurando ogni nostro orizzonte e facendoci naufragare nel non senso della disperazione. Nonostante la febbrile e ostinata negazione del dolore e della follia che lo ha in sé, nonostante le terribili forze scatenate dalla crisi, nonostante la globalizzazione feroce, nonostante le sirene ingannatrici e gorgoniche della televisione, vorrei che la speranza non morisse mai, e che facesse rifiorire il deserto.

Eugenio Borgna

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Par domandâ chescj libris scrivêt a info@glesiefurlane.org*